

La Svizra cuntrastescha cun la Germania

Ina gasetta franzosa cumpareglia duas reacziuns politicas

DA GUIU SOBIELA-CAANITZ

■ **Dapi 1973 sorta mintga di a Paris la gasetta «Libération», da tendenza socialdemocratica. «Libération» online dals 19 d'october 2015 commentescha en ses editorial las elecziuns federalas dals 18 en Svizra:** «La pps, già emprima forza politica da la Svizra, ha anc rinforzà sia posiziun (...). Lezza partida prosperescha cun sbittar mintga adesiu a l'Uniun europeica (UE) e stigmatisescha ils privels da l'immigraziun. Ella n'aveva anc mai cuntanschì tals resultats: 65 dals 200 cuss. naz. cunter 59 avant las elecziuns, cun ina proporziun incredibla da vuschs (...). La partida reussescha fitg bain grazia a sia retorica xenofoba (...) che sa funda sin la fidaivladad a las tradi-

ziuns e sin la tema da privels che pudesan metter en dumonda ina tscherta maniera da viver (...). L'immigraziun preoccupescha profundamain 48% da las burgaisas e dals burgais. Il favrer 2014 ha ina votaziun 'cunter l'immigraziun massiva', promovida cunzunt da la pps, limità quella che provegn da l'UE, la principala per la Svizra. Ma gist chantuns sco Geneva e Turitg, quels chi han la pli gronda quantidad d'esters, han dà pli paucas vuschs a lezza iniziativa. La pps scumetta cunzunt sin la tema, cumbain che l'unda da fugitivs sirians pertutga strusch la Svizra. La Germania d'Angela Merkel percunter vul esser vinavant il grond pajais d'accoglientscha, schebain ch'ins spetga passa in milliun requirentas e requirents d'asil per 2015. La chance-

liera perda segir consens en las retschertgas d'opiniun, e la populaziun conservativa marmugna adina dapli (...). Ma Berlin, fidaivla a las valurs fundamentalas dal project europeic, sa ch'ella po sa fidar d'ina gronda part da l'electorat. In adversari dischoccupà da l'immigraziun ha atatgà cun in cuntè e ferì grevamain Henriette Reker, candidata cristiandemocratica per la presidenza da la citad da Cologna; il pievel da la citad l'ha elegida triumfalmain dumengia passada (...). La sanestra e las organisaziuns da la societad civila protestan massivamain cunter il moviment xenofob 'Pegida'. La Svizra sa barricadescha, ma la Germania dat vina- vant il bun exempel.» Il titel da l'editorial resumescha fitg bain il text; el tuna: «La Suisse ou le contre-pied allemand.»